



*Kamis, 04 Juli 2024*

**Ogen : Masmur 37: 16-17**



**Aminna sitik pe meherga**



Piga tahun perpudi enda mbue kal kalak pamer erta ras kebayakenna subuk teridah i bas dunia nyata bage pe arah konten media sosial. Enda nandakensa maka kegeluhen masyarakat i bas negaranta enda pe tergantung denga ku bas status ekonomi. Adi bayak ihamati, adi musil labo iperdiate. Lalap menekanken ku bas asil aminna pe labo iperdiateken i ja nari rehna. E maka mbue denga terjadi korupsi, judi, bandar narkoba, prostitusi ras kejahatanen sidebanna si atena ndatken kebayaken.

Geluh enda labo soal kai si lit i bas kita tapi cara guna ndatkensa pe arus payo. Kai ertina ndatken kerinana adi labo alu cara si payo. Ikorbankenna harga diri, ilanggarna hukum ras ndauh arah kebenaren. Tuhan labo erngena ate kerna si e. Adi bayak pe ate arus alu cara si benar. Ate Tuhan kita enda erdahin rikut ertoto seh maka kita banci ndatken kai si jadi sura-suranta.

Sitik pe adi payo pendalanken pasti reh buena ulihna, maka banci mpeturah dame sejahtera man banta. Tapi mbue ulih si idat alu la benar ntahpe asil arah kejahatanen, tentu labo erbansa geluh enda dame. Janah banci saja mpeturah kebiaren ras sinanggal. E me si itekanken pasmur i bas ogenta sendah. Sitik pe sikerajangen kalak bujur, meherga kal e asangken erta kalak jahat. Janah kuasa i bas kalak jahat pe labo tahan rasa lalap sebab banci nge ibuat Tuhan.

Si idah kasus Mario Sandy Satrio, anak sekalak pegawai pajak. I bas ia menganiaya David, maka ia pe pamer erta alu maba mobil mahal merek Rubicon. Dungna ara kasus penganiayaan jadi kasus korupsi pajak, maka bapana pe iperiksa. Pas nina Tuhan Jesus, "Lit kin gunana man sekalak jelma, adi man bana gia kerina erta-erta doni enda tapi bene kegeluhenna si tuhu-tuhu?" (Mat.16:26)

Emaka madin sitik tapi merga erkiteken arah pendahinta si benar asangken mbue tapi datna arah si la benar. Nina si nulis kitap kuan-kuan, "madin musil tapi malang man Tuhan asangken bayak tapi dem aru ate" (Kuan.15:16)

*Sitik ras mbue e pemere Tuhan*



Blank writing area with a light blue background and a wavy top edge.